



Bosnia and Herzegovina
Federation of Bosnia and Herzegovina
CANTON SARAJEVO
Ministry for Science, Higher Education and Youth

Broj: 27-02-04-53704-22.1/25
Sarajevo, 2.12.2025. godine

SKUPŠTINA KANTONA SARAJEVO
n/r predsjedavajućeg Skupštine
- Ovdje -

PREDMET: Odgovor na zastupničko pitanje zastupnika u Skupštini Kantona Sarajevo Adija Kalema, *dostavlja se*

Veza Vaš akt, broj: 01-04-53704-22/25 od 14.11.2025. godine

U okviru 26. radne sjednice održane dana 14.11.2025. godine, a u skladu sa čl. 211. i 214. Poslovnika Skupštine Kantona Sarajevo, zastupnik u Skupštini Kantona Sarajevo Adi Kalem je u okviru tačke dnevnog reda „Poslanička/zastupnička pitanja, inicijative i odgovori“, postavio sljedeće zastupničko pitanje:

„Javni poziv za sufinansiranje naučnoistraživačkih, umjetničkoistraživačkih i istraživačko - razvojnih projekata i programa iz Budžeta Kantona Sarajevo za 2025. godinu je raspisan, a za ove namjene u Budžetu je planirano ukupno 4.400.000 KM, od čega 3.900.000 KM za Program A -Jačanje naučne infrastrukture. Molim pojašnjenje u kojoj je fazi realizacija ovog poziva, kada se može očekivati objava rezultata i dodjela sredstava, te koji su razlozi eventualnog kašnjenja u proceduri“.

Ovim putem dostavljamo odgovor na zastupničko pitanje:

Ministarstvo za nauku, visoko obrazovanje i mlade Kantona Sarajevo je, u skladu sa Odlukom Vlade Kantona Sarajevo o utvrđivanju namjene, kriterija i načina raspodjele sredstava za podršku naučnoistraživačkoj djelatnosti iz Budžeta Kantona Sarajevo za 2025. godinu („Službene novine Kantona Sarajevo“, broj 22/25 i 23/25) (u daljem tekstu: Odluka), dana 11.6.2025. godine raspisalo Javni poziv za sufinansiranje naučnoistraživačkih, umjetničkoistraživačkih i istraživačko-razvojnih projekata i programa za 2025. godinu.

U fazi realizacije Javnog poziva nastupila su određena proceduralna i vremenska ograničenja, proizašla prije svega iz otežanog funkcionisanja Ministarstva u periodu nakon raspisivanja poziva, što je onemogućilo blagovremeno i u potpunosti zakonito provođenje svih faza postupka propisanih Odlukom.

Posebno ističemo da je članom 7. stav (1) Odluke propisano da realizacija projekata mora započeti u 2025. godini, a sredstva za budžetske korisnike moraju biti utrošena do kraja fiskalne godine. S obzirom da je zbog specifičnih okolnosti došlo do značajnog prolongiranja postupka, realizacija projekata i utrošak sredstava u roku više ne bi bili mogući na propisan i zakonit način.

Dodatno, članom 15. stav (11) Odluke propisano je da Komisija za evaluaciju aplikacija svoj zadatak mora okončati najkasnije u roku od 90 dana od dana početka rada. Imajući u vidu obim prijava i složenost procesa evaluacije, te kašnjenja nastala u fazama administrativne obrade, Komisija ne bi bila u mogućnosti da u propisanom roku izvrši evaluaciju prijave po programima A.1a i A.1b. To bi dovelo do neusklađenosti s odredbama Odluke i rizika od proceduralnih nepravilnosti.

Također, značajan dio planiranih projektnih aktivnosti odnosi na nabavku naučnoistraživačke i umjetničkoistraživačke opreme, pri čemu Odluka predviđa mogućnost finansiranja takve opreme do 80% vrijednosti projekta. Međutim, zbog navedenih vremenskih ograničenja i tehničkih procedura javnih nabavki, realizacija nabavke u okviru tekuće budžetske godine nije izvodiva u skladu sa Zakonom o izvršenju Budžeta i budžetskim kalendarom.

Istovremeno naglašavamo da se realizacija ostalih dijelova Javnog poziva, na koje se navedene poteškoće nisu odnosile, odvija u potpunosti u skladu s odredbama Odluke i planiranim budžetskim sredstvima, kako bi se osigurao kontinuitet podrške naučnoistraživačkoj djelatnosti u Kantonu Sarajevo.

Shodno navedenom, objava rezultata i dodjela sredstava za one programske komponente koje se nastavljaju provoditi biće realizovani u rokovima koji su u skladu s Odlukom i budžetskim okvirom.

S poštovanjem,



Dostaviti:

- Naslovu;
- Stručnoj službi Vlade Kantona Sarajevo;
- a/a.